



Otvoreno pismo gospodinu Garibiji

Poštovani,

„Služba za zapošljavanje Kantona Sarajevo“, Sarajevo sa žaljenjem mora konstatovati da jučerašnji intervju g. Garibije dat portalu Klix obiluje podacima koji apsolutno nisu tačni i koji su samo želja da prošlost bude ljepša u sadašnjosti.

Citiramo:” Imali smo drugi pristup, nikada ni jedan program u Ministarstvu ili na Vladi nije stao zato što je neka firma bila na spisku ili zato što neka druga nije bila na spisku. Nije to tako teško.”

Tačno je da nisu stali programi jer su se firme birale tako da su se po nalogu ostavljali brojevi na protokolu, tako da se dokumentacija potrebna za odobrenje programa dostavljala ne u sastavu aplikacije već naknadno i tako da je Služba bila prinuđena da napravi ovu analizu kao podlogu za podnošenje krivične prijave.

Što se tiče korištenja sredstava moramo javno upoznati ministra da je sa 2019. godine na 2020. godinu prenesen historijski višak prihoda nad rashodima u visini od 35 mil. KM i o kakvom trošenju rezervi se govori nikome u Službi nije jasno. Ovaj podatak se može provjeriti u bilansu za 2019. godinu.

Po pitanju zapošljavanja nezaposlenih osoba može se konstatovati da je po programu obuke, prekvalifikacije i dokvalifikacije za koji je utrošeno cca 340.000 KM niti jedan polaznik nije zaposlen, a i po ovom programu Služba je u procesu podnošenja krivične prijave.

U velikom broju odobrenih programa koji se mjere stotinama hiljada KM nema, niti je traženo pravdanje sredstava.

Koliko se brinulo o programima dovoljan je podatak da je tek prošle sedmice usvojen program rada za 2020. godinu.

Ono što treba znati kompletna javnost, je to da je Služba redovan klijent istražnih organa i upravo po onome o čemu govori g. Garibija.

U 2019/2020 godini inspekcija Kantona Sarajevo je u više navrata izdavala prekršajne naloge i čudi nas da se o ovome ne govori.

Ne želeći umanjiti rad g. Garibije u ministarstvu koje je vodio, ne možemo se oteti utisku da je g. Garibija dobivao potpuno pogrešne informacije, jer ako je Služba zaposlila 2.800 nezaposlenih osoba onda treba reći da je u isto vrijeme na evidencije Službe prijavljeno preko 5.000 naših sugrađana.

Na kraju, molimo sve one koji žele da govore o radu Službe da prvo pogledaju bilanse za 2019. godinu, da pošalju upit tužilaštvu Kantona Sarajevo, koliko se vodi predmeta u tom tužilaštvu, da se inspekciji Kantona Sarajevo uputi dopis kako bi se utvrdilo koliko je izdato prekršajnih naloga i u kojem iznosu Služba treba da plati kazni (jedna takva je već plaćena u visini od 10.000 KM i o čemu je javnost upoznata), da se analizira koliko je ostalo neriješenih predmeta za isplatu novčane naknade (hiljade) i koliki će to uticaj imati na programe u 2020. godini itd, itd.

Kada se napravi ova analiza onda će i bivši ministar imati puno pravo da pohvali rad Službe iz perioda njegovog mandata ili da prihvati da stvari nisu uopće onakve kako ih je saopćio javnosti.

Sve gore napisano nije da bi se umanjio rad g. Garibije, već da bi i on saznao stvari koje su općepoznate u Službi.

P.S. Na gore opisani način Služba više niti radi niti će raditi.



V.D. DIREKTORICA

Edina Ljubuškić

Sarajevo, Đoke Mazalića 3,

web-stranica: www.szks.ba; e-mail adresa: info@szks.ba

Tel/::+387 (33) 569-100, fax: 204-177; Matični broj: 4200304610003;

Poreski broj: 01079085; Računi Intesa Sanpaolo Banka d.d. Sarajevo:

1549212010171056-depozitni račun, 1540012000135120-transakcijski račun

